

The Makuilongdi Express

Liangmai Daily Newspaper

“Mazibo niu ngamne”



Honorable, Dr. Thomas A Cellucci, MBA tu hai H. E. Honorary Prime Minister of the Naga-American Council leng kada khai mide chiuju Grace Collins H. E. Honorary President Naga-American Council gu tacham ga dinne.

Chakhuang thiuju bambo Manu Nampibou Marinmai hai masuang PRO, Ministry of Defence, Government of India bam gasu “Joint Director, Ministry of defence, Government of India” ga promotion khang mide. Aliu Liangmai leng ronna makjuu Naga mai zatti lengdi tazu kadibo we.



Zengtung 14 Karehiu 2023 Machanai Chiang PO Tamei ,Tml. Dist. Manipur Vol.II. Issue 1 page 1

Palamra nuan phijeng sira kashaibo we; chiudi Tingwang niu aliu Rapiu Jesu Khrista pen gasu pikhaibo kalen sira tingtheng karingbo si ye. Romemai 6:23.

Laapui Sushri Anusuiya Uikey niu Manipur State gu kasanbo Governor thiulan mide.



Imphal. Kareh. 12: Manipur gu Governor leng thiuju ndanai niu Laapui Sushri Anusuiya Uikey President of India Droupadi Murmu niu tacham pipad mide chiuju dinne. Masuang Manipur gu Governor phungbam niubo La Ganesan hai Nagaland gu Governor phunglan misune chiuju tacham ga dinne. Sushri Anusuiya Uikey hai luan 18th bo Manipur Governor thiuju phung rabo we. Pahai Chhindwara Madhaya Pradesh gu state gasu we chiuju dinne. Paniu Manipur gu Governor thiuwang botu Manipur Chief Minister N Biren niu thonkiu khaibo cham poupad khai bo nai nchamjiu tadlan mirabo Governor La Ganesan tudi kanui khaibo cham hai poupad khai mide.

Khengkhaibo

Mathiu khuga sikhaibo, Thaikum pakak khat thiuju ra nai machang makjuu nidkak ga palon sum thiuju haibo tacham hai padra mide. Pasai pajat chabo gasu nai machang mathak makjuu tienra marang bamme. thonkiu we.

Langmei Higher Secondary School, Tamei ga 12th standard board examination centre lekhai mide.



TME. Tamei; Kareh. 13: Pawan katheng aliu Liangmai kadih ga tashi kati boga maikumjiu maksai mai khu lam kumjiu abam gasu school khatdi college tadra pajat chamakjiu bambo ngoukhai lujuu papi-para thiubo jupou mainiu manang khaibibo pienniu thainai mien haidi class 12th standard gu board examination centre hai Langmei Higher chakhuang thiuju bambo

Secondary School, Tamei ga lekhai mide. Masuang gara Tamenglong district HQ gasu khaibam niu bo we. Haileng jengniu takiu khaibibo Munhu Awangbow Newmai, Minister for Water Resources and Relief & Disaster Management, Government of Manipur khatdi Dr. L. Sarat, retired professor of Manipur College, panai tu aliu Liangmai gu tam-tambo

contd. in p.2

The Makuilongdi Express gu Office Tamei HQ, Gaililong ga lekhai bo tien thiukhai mide.



TME. Tamei; Kareh. 13: Liangmai gu khat ronna bambo “The Makuilongdi Express” gu office hai aliu Liangmai namdi gu HQ ga bammak doulakbo jengniu ndaanai zengtung 12th Karehiu bonai office dedication cum open discussion hai office ga tadkiu khai mide. Haibo tienrang ga Tamei wanjeng ga bambo school princi

pal, church pastor, village chairman khatdi CSOs leader mai wangjiu kakheng thiu ncham khaibo ronna makjuu ndebo jai kamsai haibo news paper hai tad taphuang lu ralo chiubo madin thiu cham khai mide. Wangjiu padam lukhai bimai mathiu tu The Makuilongdi Express gu staff lamsu niu thonkiu khaibo cham hai mathiu khuga poupad khai ye.

Turkey nai Syria ga kathi gasu shai mibo riak 34,000 khang mide; phiubo ngam tadkiu bam khaye.



Imphal Times

Hatay (Turkey) Karh.13: Tad mibo nidkak ga Turkey nai Syria gu kadih ga kathi tanbo wangbo ga chaki rammai pahkiuju chamai 34,000 pasan shaitang mide chiuju tacham ga dinne. Kashai thiuniu maitu phiubo ngam hai mathak makjuu tadkiuju bamme, siga chaki pahkiuju sinkhai mibo ga ringjiu bamniubo chamai kakeng tudi doulu we chiuju dinne. Tadmibo Nidnai naidi maipuimai pawon phungkinbo pui khatdi naamai khangnia chiuju ringbam niubo phiudou luwe chiuju dinne. Kathi wanglubo sai pacharokbo nai mide chiuju tacham ga dinne. Turkey nai Syria ga padbambo chariubo tu kadih katam-tambo dungdi wangjiu nkha khaijiu bam mide. UN niu di chapu-chagaa khatdi katiu-kasak chariuiu paliu kilu hajiu bammai leng nkha khaijiu bam mide.

Karingting Lunlung

Tamei Bus gu lunlung.



@@@ Singnahpiu nang palung lamgu ticket lumah palen/pamah rilam gu lujaa?

#####Palung lamgu ra ticket hamijiu pamah rilam gu ludai!!

Pangam keng jubo agu zungpui jengniu Tingwang bamme chiubo I si ye.

Editorial

The Makuilongdi Express hai tu maning chakung khaijiu ken bammai mathiu tu thaikum rai thubo publication padbo nai nchamjiu chunwibo takum kasan gu salam pikhai ye. Tadmibo takum ga matun makdi aliu zat khat thiubo gu kadih raha di bammak kasabo bam jengniu kamsu hou khai de. Siga naliu gu suggestion kawibo nai kachu khaijiu wa kachang tienlu makdi tienkhai lujiu mathiu tu chunwibo cham hai poupad khai ye. Thaikum haidi mathiu rathoi penniu suisai changam kamsu lanra kambambo nai nchamjiu tadmibo takum suang wijiutadkiu lura jengniu mathiu gu kawibo champi ladpi khaibo nai kakheng di thiukha khaijiu bamra khengkhai ye. Maigu ngamkam kumjiu kamtang lulakjiu bamdi aliu gu kangambo sotga matanjiu kambam bowe. Wirabo maksai gengan lurabo jaiga khangkhat-khangkhat di katisan khaijiu haibo news haisi pating thengjiu tadngam lura mathiu padam lucham khai ra khengkhai bode. Mathiutu thonne.

Langmei Higher Secondary School, Tamei....

condt. from p 1.

phom, LNKR-M, LNC-M, VAC lamsu thonkiu khaibo cham nai chunwibo cham hai kengjiu poupad khaijiu bam mine. Thaikum niu raithubo thiujui 12th exam khairabo nai chamjiu ariaknah maldi kaden mawi lujiu examination centre zan wiji percentage hai wiji dou lura matan khailo chiujiu di CSOs lamsu kachu san khaijiu bam mine. Din lanjiu haileng jengniu chariujiu takiu khai mai tu aliu Liangmai mathiu di thonkiu khai siji mangai makjiu bamkhe chiubo di dinsan khai mide.

Chalad N-buong

Langra duifen: Tadui/singgiu maluung lamsu luangwangjiu chakhuaga fenkiubo tu dinbo we (Waterfall)

Bengaluru ga Prime Minister Shri Narendra Modi niu 14th edition of Asia's biggest aero show-Aero India 2023 hai inuagrated thiukhai mide.



New Delhi, Kareh. 13: Luan 14th bogu Asia's ga dithubo Aero show-Aero India 2023 hai PM Shri Narendra Modi niu Zengtung 13th Karehiu Bengaluru ga inuagrate thiukhai mide khatdi commemorative stamp haidi release thiutajut khai mide. Haibo tienrang ga PM niu pagu tacham ga dinjiu Aero India 2023 haisi India muisu khangbo khatdi namdi 100 pasan wangjiu haibo ngamkam ga njou kabambo si kadhipiri mainiu aliu tu

malum bambo we. Takum kariu malam ra aliu maikhu gasu chari mania haisi lubam niu we chiudi tuhoira walam hina kakalibo padbo jeng gasu chari mania hai namdi 75 leng aliuniu pipat (Export) ngam mibo we. Nkiujiu defence sector gasu namdi kakilam export thiukhai jiu 1.5 gasu 5 billion haisi 2024-25 lungga matan lura machun bamme. Haibo tienrang ga 800 exhibitors, Indian MSMEs, starups khatdi kadhipiri ga pazan katad-katad bo companies dungdi wangjiu padam lukhai ye chiujiu tacham ga dinne.

Happy Valentine's Day 2023



Kadhipiri pakhiang naga Karehiu zengtung 14th nai hai tu Valentine's Day chiujiu mania jiu bamme, chiudi haibo naitu nde chiubo gasu mania milo chiubo palam kasia phuikhe. 3rd century kenga Rome gu chawangniu Christian mai tu rehjiu kamsatbo wanga Saint Valentine tuidi kamsat miye. Haibo saint Valentine tu maning toubu thiujui Christian karaih mainiu katiu tiu ncham bo gasu suwe chiujiu kasia niu dinne. Haibo tingmik gahai panou kinaa maksai akhang aliu mai charapen niu khat-khat tu akhiak jiu chalungsa bo madan thiujui bamniu we. Tuhoi ken gadi haibo tingmik tu tamtambo jai gasu maniajiu kadhipiri ga marai thiubo tingmik kumjiu tadjui bam mine.

Mathen Cham



FIFA Best Player Nomination ga Messi, Mbappe khatdi Benzama paliu zan jou bamme.

FIFA Best Player Award 2022 gu nomination 3 finalist ruang ga Argentina striker Lionel Messi, France striker Kylian Mbappe khatdi France striker Karim Benzama paliu we. Npuimai gu thiujui Spanish striker Alexia Putellas, England maipui Beth Mead khatdi US maipui Alex Morgan paliu tu 3 finalist ga kapah khai bammi de. Haibo tathon hai Karehiu Zengtung 27 nai Paris, France gasu madu pad sune chiujiu dinne.

OFFICE OF THE
LIANGMAI CHRISTIAN CENTENARY CELEBRATION
Officiary: LNBA-M Mission Centre Chiang, Tamei- 795125.
Heritage of God's Love

To,

Liangmai Pastors, ELBA, SBA, Baptist Independence Church, BCUI, SDA, Good Samiritan Church & Roman Catholic Church.

Ref. LCCC Awareness Meeting

Rapiu luzam ga tatien thiujui bambo Pastor dung tu Khrista zan gasu chunwiji adou khai ye.

Aliu mathiu niu ramgunjiu bambo Liangmai Christian Centenary Changee rabo lamga si masan lura leng aliu madui jiu tacham din ncham khaira pageng bam mibo kumjiu aliu pawan lukhai khe. Wangkinbo zengtung 14-02-2023 bonai LNBA-M sub-Centre Church, Namdilong ga Local Pastor niu phumlingmai pachun thiukamimai dung tu majang jiu wang khai ra kukhai ye.

Pawan: 11: 00 am

sd/-

Rev. Ch. Widabou
Convenor, LCCC.